

Gwnzhaw boux bae boux dauq ndaetfoedfoed, Aunuk youq gyang vunz lai byaij dwk, caih vunz hemq gai hemq cawx, de cungj mbouj leixlangh.

Baihlaeng Aunuk haemq gyae haenx, miz boux vunzvaih ndeu cingq duet aen daeh boux mehmbwk ndeu. Mehmbwk daihsing hemq: “Gouqmingh ha, miz vunz bokloh lo……”

Aunuk dingq mbouj nyi, ciuq-yiengh byaij faenh de.

Vunz gwnzhaw dingq ndaej nyi, hoeng, mbouj miz byawz gamj daeuj bang mehmbwk haenx.

“Byawz bang gou lanz dawz aen daeh dauq hawj gou, gou hawj de 1000 maenz!” Mehmbwk itmienh gyae itmienh hemq.

Aunuk dingq mbouj nyi, ciuq-yiengh byaij faenh de.

Vunz gwnzhaw dingq ndaej nyi, hoeng, mbouj miz byawz gamj bae bang mehmbwk lanz bouxcaeg haenx.

“Byawz bang gou lanz dawz aen



daeh dauq hawj gou, gou hawj de 2000 maenz!” Mehmbwk doq gyae doq hemq mbouj dingz.

Aunuk dingq mbouj nyi, ciuq-yiengh byaij faenh de.

Vunz gwnzhaw dingq ndaej nyi, hoeng, lij mbouj miz byawz gamj bae bang mehmbwk lanz bouxcaeg.

“Byawz bang gou lanz dawz aen daeh dauq hawj gou, gou hawj de 4000

maenz!” Mehmbwk song fwngz cengj hwet, rau heiq fofu, nyinhnaeuz mbouj miz muengh lo.

Aunuk dingq mbouj nyi, ciuq-yiengh byaij faenh de.

Vunz gwnzhaw dingq ndaej nyi, hoeng, lij mbouj miz byawz gamj bae lanz bouxcaeg haenx.

Cingq youq seizneix, ndaek vunzvaih buekmingh buet deuz haenx,

fwf bungq deng Aunuk. Aunuk soemxsax mbat ndeu, de cabmax ndwn dingh le, yiet fwngz gvaqbae nyaeu dawz hozndoenj ndaek vunzvaih haenx, daihsing hemq naeuz: “Mwngz guh gijmaz?”

Ndaek vunzvaih sim baez saenz, fwf cuengq aendaeh ndaw fwngz roengz gwnznameh, cengq hai fwngz Aunuk, vaiqvid buet deuz lo.

Mehmbwk daeuj daengz henx Aunuk, dawz aen daeh gvaqdaej, daj ndaw daeh mbon ok dab ngaenz ndeu ndenq hawj Aunuk, naeuz: “Lauugo, docih mwngz lo, danghnaeuz mbouj miz mwngz gaemhdawz ndaek vunzvaih haenx, aendaeh gou couh nanz ndaej dawz dauq lo, gij ngaenz neix dwg gou bauqdap mwngz.”

Aunuk cim coh mehmbwk da ndeu, hix mbouj cieq aeu ngaenz, riunyunyum byaij deuz lo.

Gyoengqvunz humx yawj haenx mbouj miz byawz rox de dwg bouxnuk.



Sai: Ngoenzneix gou Daegcuengh, Raen dahuengx doengzban; Dawz lienz youh dawz hanz, Cam mwngz dwk lawz mbaq?

Mbwk: Seizdoeng rumzbaek nit, Bae au fwnz bikfeiz; Mij lumj mwngz baenzndei, Miz seizgan daeuj langh.

Sai: Beix mbouj dwg daeuj langh, Hix ngamj bae au fwnz; Raen doengzban saulwnz,

Siengj nem mwngz caez byaij.

Mbwk: Caenh ’aeu mwngz caensim, Siengj gyaucingz yungzheih; Langh beix miz gyaileix, Cix gaej mbaet va vunz.

Sai: Raen mwngz nuengx baenzgvai, Caenh siengj ai caemh liengj; Beix ndangdog dwg dingh, Aensim cingq gvaqmaz.

Mbwk: Beix aensim baenzsoh, Ok loh mbouj dan gou; Gouj fuj cib sam cou, Gvai gvaq gou daihbaj.

Sai: Langh nuengx caemh ndangdog, Cix gaej log beix sim; Guhdoh gaq giuzrin, Ndaej diem din caez byaij.

Mbwk: Roeg ra doih caux rongz, Gyuk haeuj ndoeng caca; Aen nuengx seng ndoi laj, Caengz raen mbaj ciuz va.

Sai: Nuengx ha sim gaej gaep, Mbwn laep cij diemj daeng; Saedcej ndei caengz daengz, Ngoenzlaeng raeuz menh angq.

Mbwk: Ndaw ndoeng song roeggae, Caemh mbin bae doiqnaj; Vavengj hai gwnz cah, Muengh rwi mbaj daeuj ciuz.

Sai: Mwngz nem gou Daegcuengh, Beix dog nuengx hix dan; Dwk rap caemh diuz hanz, Saedcaih ngamj lailai.

Mbwk: Duzvaiz maij duzvaiz, Caengz anbaiz caemh riengh; Beix siengj nuengx hix siengj, Lau vunz ciengq hanzvah.

Sai: Caenhau raeuz caezsim, Feiz yungz gim mbouj bienq; Hanzvah caih vunz ciengq, Cim caeuj sienq doxlienx.

Mbwk: Siengj heuh mwngz daeggo, Ciuggoq nuengx baenz vunz;

Daek vanj haeux doengz gwn, Caemh gaem fwngz caez byaij.

Sai: Ranz Daegcuengh caemh hoj, Hix dwg ndoq dangqmaz; Bogut nem bohaz, Ngamj ndaej ha song gyaeuj.

Mbwk: Langhnaeuz caen baenzndei, Bae au fwnz dawz gut; Beix gvej nuengx guh cug, Cib cuk maenh youh gvai.

Sai: Song bofwz doengzbingz, Raeuz hix ging baenzhab; Nuengx cug beix guh rap, Caez dab giuj baema.

Mbwk: Dwk fwnzrem byoq feiz, Dawz ndaej hoengh youh raeuj; Caemh naengh fwnz song gyaeuj, Raeuz menh daeuj damzcingz.

Caez: Raeuz doxgyaez guhdoh, Lumj doengz doiq vazmeiz; Baenzseiq mbouj doxleiz(liz), Cib cuk ndei daengz laux.

Veiz Gozcingh dwg boux canghhag hongbing, doiq gij swhsiengi canloz Mauz Cwzdungh “yinx dig haeujlaeg, gven dou moeb duzma” haenx, miz dijvei gig laeg, caemhcai miz gvaq gingniemh sizcenj. De naeuz gvaq, danghnaeuz Meijdigozcuji dai Yeznanz haeujfamh guek raeuz, bietaeu nei raeuz cix nyiengh mbang dieg okdaeuj gonq, yinx dig haeujlaeg, liux le youq mwh habdangq, giz habdangq caeuj vunzdig guh baenq-cienq, doeklaeng siumied gyoengq-de. Seizhaenx, cunghyangh rox guh anbaiz, aeu fugcoengz cunghyangh, hoeng aeu miz gij bwh gonq, aeu ciuq gij saehsaed Guengjsae bae guh gij baijbouh hab’wngq.

Bi 1965 nienzco, Veiz Gozcingh doiq boux suhgi siveij ngamq dai Liujcouh diuh daengz Namzningz haenx Siuh Hanz naeuz: “Diuh mwngz daeuj Namzningz guh hong caeuj Liujcouh mbouj doxdoengz, Namzningz miz sam gienh saehcingz aeu daegbied guh ndei bae: Daih it dwg

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□ Hoz Saubangisii Cioz Siengzcoub Liuz Giongliuj Cioz Siengzzen boiz

ca ndei nungzyez, bwh ndei daenz ndei haeuxgwn, rom haeux baengh lwgminz, baujingq bingmax hoenx-cienq ndaej haeux gwn; daih ngeih dwg gij dieg byandoq ndoindoq hab ndaem faex haenx yaek aeu ndaem gofaex, yienghneix hoenxcienq le ndei yondang, fuengbienh hoenx youzgiz, couhsuenq yenzswjdan nyingz gvaqdaej, caemh ndaej gemjmenh langhcung caeuj yenzswj fuzse; daih sam dwg guh ndei hong yungginh youhsuz, bingdoh daezok iugouz, yaek caenhrengz bae banh, caenhvaiq banh ndei.

Mwh Meijgoz ciemqhoenx Yeznanz ndaej caenh’ itbhouh bienq ak caemhcai haep deng aencienz guek raeuz haenx, Veiz Gozcingh lai baez bae daengz dieg henzbien caeuj diegbya baihsaebaek Guengjsae ngonczaz, diemjcaz gij cingzgvang bwhhoenx caeuj guh “sam sienq” haenx. Miz baez ndeu, de caeuj gij vunzgaemhong Cioz Yinggih, Liuz Cunggvei, Ho Vanvaz daengj vunz, ngonczaz Majsanh, Duh’anh, Bahmaj, Doenglanz daengj diegbya, yawjraen aen gunghcwnz bwhhoenx bingdoh guh haenx, gaeng dwk doeng diuz

roencongh ndeu, cingq gaenjcieng vat doeng diuz roencongh daihngeih dwk, de gig angq. De naeuz gij goengdaez bingdoh: Ndaej gaj ngoenz sam ban guh hong baenz seiq ban guh hong, haidoeng song aen bakcongh gonq, liuxle haenq vat aen daihsam; yaek aeu son goq gisuz hawj bouxbing, youq gij goekdae baujingq ancienz, baujingq cizlieng haenx gwnzde gouz vaiq; aeu caeuj vunzlai bonjdieg guh ndaej baedauj, bang gyoengqde guh ndei swnghcanj.

(caengz sat)